

江陰縣志

卷二十一至二十四

十五冊

江陰縣志卷之二十一

方外

昔人之黜異端謂其有害於正學也今之二氏誦經典習科儀爲衣食之資而已異端云乎哉庚申以來寺觀燬廢者十有八九後經御史奏定不列祀典菴廟不準建復棲託無所繼起者稀間有緇流道士不過司陰晴水旱之祈禱而已至所謂談空空於釋部覈元元於道流數十年來曾不一見故仍舊志而無所增入也志方外

釋

江陰縣志

卷二十一

方外釋

一

唐烏窠道林禪師潘氏子披緇謁國一禪師得法歸抵西湖有大松盤屈如蓋乃止其上人因以烏窠名之後住邑西秦望山蘆岐菴內有放生池嘗買螺螄半截者放池內今所生螺螄皆半截又見鄉人破魚去鱗亦放池內故又有無鱗魚

法響禪師自狼山來結飛錫菴於定山麓有虎馴伏跑地得泉

宋子邦元覺禪師住壽聖院有一僧問如何得速成佛曰有成終不是佛亦非真湛然空明自有理會問答見五燈會元

復法師紹興間住迎福寺書華嚴經畢擲筆冰池化爲青蓮

松源禪師名崇巖生處州之松源嗣法於密庵移錫邑之光孝寺嘉泰二年示寂建塔於北高峯陸游爲之銘

元狗腿和尚住太清寺以嗜狗肉得名邑人建大齋和尚赴之齋畢索盃吐於水皆成金魚

徐臻大師淮安人爲夏港小龍寺僧少勇敢任俠盜起馬馱沙陳某募壯士拒之得張氏父子爲首領俱被擒臻素德張懷大斧入賊中乘守者醉臥砍殺六人斷鎖負張從間道出王逢作義僧行

江陰縣志

卷二十一

方外釋

二

西玉名琳至正間出遊會亂歸省父兄皆歿亂中母創甚嫂以不辱溺井死琳負土掩之乞食養母母卒遂奔隱吳門刺血寫華嚴經王逢張宣嘉其孝皆贈以詩

茶溪明鏡和尚臨終偈曰忝入空門四十秋參師揀教未嘗休才方得到無心處趁此無心可別遊擲筆而逝預造無縫塔藏骨花山

慧朗至正二十五年僞吳張士信徵僧度牒錢僧苦之時慧朗住杭之天華寺斷一臂說偈以獻得免徵王逢有詩記之

明雪庭禪師住乾明寺覩萬佛閣金碧晃耀眉宇恍然悟

一毫端現寶王刹之句除日聞鐘聲忽自解脫著有幻
寄集

常惺廣寂禪師卽萬曆舉人馮定棄廣州通判歸依蓮池
大師捨宅爲放生池建十方庵夏不驅蚊冬不解衲戒
人屠割每跪而哭自法喜庵至夏港青暘禁止臨流設
網代納漁稅崇禎間掩關龍墩示寂建塔於花山佛手
窪西園其捨宅也

慧轂圓輪禪師參龍池幻和尚有悟天童磬山俱與比肩
晚年五坐道場示寂廣福寺

照浮佛幻禪師住浮山聞爆竹聲輒悟初不識字忽於睡

江陰縣志

卷二十一

方外釋

三

夢中文思怒生遂得文字三昧有山中咏十二時及怪
松怪石歌人傳寫之

洞如禪師名通睿薛氏子參龍池爲密雲和尚所器歸縛
茅於花山佛手窪冥心元學卽樵牧罕睹其面

元白禪師傘居和尚弟子參天童密雲悟入說法廣福寺
探奧指微圓暢條達

雪徑和尚熹宗叔也辭爵爲僧善書十七帖嘗棲廣福寺
遠塵房每登講席宣說內典四眾贊歎遠塵房有眞阿
練若四字其筆也蒼勁秀硬體勢飛動

靜聞迎福寺僧禪誦垂二十載刺血寫法華經以供雞足

山迦葉道場同徐宏祖渡湘江遇盜槩墮灘水擊經於頂得不失竟病創死宏祖攜其骨與經間關萬餘里瘞迦葉道場并爲建塔

國朝大覺普濟能仁國師名通琇號玉林楊氏子年十九師磬山天隱和尚未幾大悟住浙之武康報恩寺順治間應

召封今號三

賜金印一

賜紫衣復住杭之天目山獅子正宗禪寺示寂清江浦慈雲庵建塔天目之東塢邑東雙林寶倉兩庵其歸憩處千金斷

江陰縣志

卷二十一

方外釋

四

其放生河也

別溪通振禪師得法天隱往來於四溪東禪諸處住花山之九蓮庵拓地增建緇白景從行履篤實有古尊宿風惟心十信庵僧乙酉圍城中受閻典史乘城紀畧一編戚中書白金二千時平後傳其書於世而返金於戚其行爲最高云

印白名濟玉乙酉之變屍橫載道印白操舟拾骸骨得二萬七千有奇其族徐君實捐田作義冢葬之里人創爲澤枯庵俾焚修其內壽八十三卒葬義冢墓側紹元於黃晞遣發時盡出己資又多募金從兵燹中間關

數千里贖晞以歸退老於萬佛林

正志號藥庵卽明行人熊開元廷劾周延儒者也嘉魚人字魚山天啟進士初令吳江崇明徵拜給事中以抗疏謫官稍遷行人劾延儒廷杖遣戍唐藩時擢太常卿左僉都御史乞歸汀州破遂爲僧初居常熟三峯道場張有譽延主十方庵巡按某其門人也見而識之欲迎入署大聲呵之已復熟視痛哭揮令去乃居長涇興濟庵晚移虞山眞際寺化去

劔庵明季嘗爲武將力能挽千觔初居萬佛林移錫於蕩霧墩自號杲頭陀博通內典工詩文康熙二年廣福寺

鐘樓向夕則有物擲石梯上如雨寺僧以頭陀之行高也環請計師曰必狐耳若以梧子油炙雞置樓下必來啖而吐可縛也如言果獲一狐作人語云吾修數百年江靖間所懼者三人若何人敢擒我僧問三人爲誰狐曰靖江令鄭重東郭單學究城南杲頭陀僧曰吾所奉者杲師命也曰若是吾當避之乃縱之去

碧天陸氏子年十三禮藥雨爲師祝髮圓覺庵狀貌魁傑受戒於金陵華山道行日高蘇門陸德敷夜夢布袋羅漢至華山遇師與夢協遂延主積善庵

賜衍真諦額示寂後三歲啟龕火之色如生燄中舍利纍纍吳門律宗多師傳衣鉢云

善鑑汪姓湖廣黃岡人康熙間從軍討耿逆破廈門島入烏龍江下興化以軍功加明威將軍墜馬落齒遂爲僧於圓覺庵通經典工書法兼能吟咏

恆轉靖江人住鎮山戒行堅苦康熙二十七年秋示寂十日前預知之至期沐浴更衣入龕端坐合掌而逝慈修善慶庵僧少無賴年三十爲僧爲人言休咎頗驗一夕遠近見庵內有光駭爲火至則寂然已坐化矣未死時向空中語曰某某約同行何勿至咸嗤之卒之夕門

有三丐形貌古異麾之不去師甫示寂倏不見有臺廣福寺僧年四十攜子祝髮於寺苦行寂滅終日端坐誦經時與黃直方相對默語子曉嵩爲講師翹楚修持如其父

聞谷華嚴庵僧七歲聞師誦華嚴經恍惚若有得時拈筆作偈師奇之命參學於三峯拈花諸處遍歷講席久之爽然曰某旣棄世俗奈何復爲諸方作柴米主人耶乃歸廣福寺以終

水上僧初爲妙嚴庵行童隨師往普陀舟回過大蓮花洋合掌籲空畢遂躍入水越五月歸叩門眾僧駭不納語

以師在元墓逕往爲師具述初入水時見深目巨顙僧乘一木板拯而載之倏抵舟山指示村舍投宿及旦入舟山鎮海寺從首座受法緣思本師遽歸而至此師挈之還其後道行傑出人遂號爲水上僧

吳拜佛自遠方來住大橋鎮病疫者延之拜佛無不愈康熙五十五年歲旱里民設壇請禱遂絕粒日夜拜不輟三日而雨雍正元年請禱亦雨酬以財不取問其名曰僧有何名喚我吳拜佛可耳卒葬雞籠山

湧臺夏氏子爲妙嚴庵僧寫經五載參內典明徹了悟受衣三峯爲漢祖嗣工書法能詩

江陰縣志

卷二十一

方外釋

七

廣善王氏僕爲僧於文林白土庵初不識字參學得悟背誦經典如流嘗棲湖州麻谷山二虎日伏左右湖民異之爲建超過寺久之歸省舊主謂曰主明年某月日遘疾當終主怒逐之屆期果疾廣善與其徒復來爲誦經視斂而去

律深號慧海圓覺庵僧善詩畫能書乾隆八年建藏經堂五楹邑令蔡澍額曰枕山并贈以詩曰書法思懷素丹青仰巨然道人江上秀風尚企前賢出定攤詩卷臨流煮石泉初無蔬筍氣談笑亦隨緣

聞學天目禪源寺僧來主香山寺丈席見殿宇滲漏寺旁

文選樓亦就圯卽募貲修葺一日謂其徒曰今日甲子
吾西逝矣作偈云繼祖傳燈接虛響開堂說法鬼打鑼
鼻孔今朝拈正了蓮花池上見彌陀偈畢遂逝遺命法
嗣際道封龕時際道在禪源寺比歸已越二十七日矣
面猶如生

眞如號了梵浙江會稽人曾官縣丞以憂歸過江都參昭
月和尚有悟旣葬親棄家爲僧受戒於金陵寶華山戒
行精勤嘉慶三年邑人延主廣福寺丈席修般若尊經
六百卷寶積經百二十卷善八分書五年至蘇州西華
山秀峯寺化去

道

晉許遜字敬之汝南人太康初爲旌陽令後棄官東遊卜宅於青暘鄉從女仙湛母受正一斬邪術至豫章遇一少年自言慎姓遜注視曰此老蛟也跡之化爲黃牛卽剪紙化黑牛與鬪命弟子施岑揮劍中其股妖奔井中後出至長沙變人形贅賈玉家遜往叱之蛟不能隱蜿蜒堂下以水噴其子亦變爲蛟并斬之復謂賈曰蛟所居之下多水不速徙將爲淵賈如言他徙宅果陷遜還豫章蛟之餘孽尙熾復命施岑斬之役鬼神於牙城南井鎔鐵爲柱下施八索鈎鎖地脈又鑄鐵符於鄱陽湖

江陰縣志

卷二十一

方外道

九

口杜妖從入路以鐵蓋覆廬陵元潭制其所窟之數由是妖絕至凝康二年百有三十六歲八月朔旦仙去青暘道成墩其遺跡也

明高俊字彥文少遊金陵遇異人得書數卷謁真人於龍虎山三載歸謂人曰吾術可移造化役鬼神矣有病魅者佩以符卽愈嘗飛劍斬妖於白下大旱禱雨墨水所灑雨卽至過江遭風書符舟尾行倍疾嘗暮歸無燭拱手作法卽有二燈前導或戲求風雲雷雨符書其掌中令登高啟掌應手而至三吳兩浙無不知有高法官者投以金帛輒趨去其法不傳

周打羶傭身羶帽肆以養母一日遇二道人於江岸曰若欲仙乎曰欲之道人引至鷲鼻山指江流曰能投此吾度若卽躍入乃在君山之巔視道人失所在由是走千里不移日嘗晨起至金陵持其鄉人家信歸甫早食時也其家發書見時曰曰若得母仙乎周恍然悟歸與母哭別以死比葬舁棺者怪其輕過橋咯咯有聲啟視之惟斂時一竹杖

張元靜居天壽觀慎行勤學道經儒書靡不該貫以真人邵以正薦奉詔修大藏經年八十餘能跣行雪中所居室空洞無物惟木榻木枕而已

江陰縣志

卷二十一

方外道

十

國朝馬法師號天然受法於穹窿山施法官有召鶴詩殄狐記元門功課錄

梅道人名曇隱金華山兀坐清修沈法師開恆一見異之叩求修煉術引與歸旣而主文林包氏能書善詞賦喜劔術包氏求其書揮草數幅怪偉絕特未幾遊梁溪後有遊金陵者遇之牛首山蒼顏轉沃計其年九十六矣沈法師名開恆字元亮年十一從馬法師學道後得法於洞霄宮孫真人嘗爲虞山李岳勳治怪李有神異記傳其事性至孝母死廬墓二年

段志載江西人少得道術屏居龍虎山精心修煉供奉京

師五載遇旱祈禱無不驗常治怪現形人尤異之告歸
樂綺山幽致遂終於山之白雲庵

薛存仁字抱一幼孤年十六修道周文襄祠厯穹隆五臺
諸山受法於松江盛度師越二十載歸通五雷正法祈
禱驅邪多靈應母卒廬墓二年弟子周天緯沈大紳俱
得其傳禱雨輒應亦善祛邪

沈法師名謙號桐山修目踈髯工字畫善詩賦精研道術
人都供道錄司職獲事

世宗於潛邸

賜號鐵笛真人以青陽錦樹道院爲其棲真地

江陰縣志

卷二十一

方外道

十一

詔年希堯擴而新之構殿宇置田畝鄂爾泰爲之記

蔡念劬少習儒後修道於天壽觀長身玉立善作青詞文
彩蔚然與人語必以孝友相規

惲養深字靜山沈謙弟子涉獵文史工書畫士人多與之
遊康熙間入都職道錄司南還葬親荷

恩賚甚渥

婁法師名近垣松江人受法於沈謙雍正中與惲養深入
都祈禱有功

封妙正真人並於大光明殿建西方丈居之領道錄司事

江陰縣志卷之二十一終

